

Tañtaña tsghatá lwa Pwal ña 1 Timute

Gazgu

¹ Ii Pwal, ghunatá mnda Yesu Kristi, manda ya mnaf Lazglafta mnda mba amu nda Yesu Kristi ya faf mu ta ghəñ tida ta vinda na delewer na.

² Ña kagha Timute*, vərda zwanja da ma zlg hay nda ñuduf ta vinda yu. Ka vlaghavla Lazglafta ta nzakway ka Da, nda Mghama mu Yesu Kristi ta zɔakatahudani, nda tawa hidahidani, nda zɔakwani.

Dasuwa ka kuni nda gwal ta taghanatá ghwadaka skwi ta mndu

³ Manda ya si ta mnə yu ña gha ma sli'a da da luwa Mekaduniya ya kay, ka nzata ka ma luwa Afisus, kabga mamu gwal ta tagha tsakalawi ña mnduha. Ka dvanaghata ka ta həñ ña zlanja tañ.

⁴ Ka mnanata ka ta həñ, yaha həñ da laghwi da hamtá ghəñ ma gwada ta prukutunzum, nda mbəda mndəra mndu kul had lu dza'a kɔanakta. Ta klaktá hwazlaɔaku, ka zlanjta ñlaku ta kəma ta kəma ma slna Lazglafta ma zlg hay nda ñuduf tsaha ya.

⁵ Klatá ghəña tsa gwada ta mnaghata yu ya ná, tsaya sli'anaftá dvu ya ta sabi ma ñuduf ya nda ghuɔa, nda vərda ndanu kul had sana dga ghəñ, nda vərda zlg hay nda ñuduf.

* **1:2** Ngha ta slna gwal ghunay 16:1.

⁶ Tsughwadaghu tsughwada sanlaha ta tvi, ka laghwi zadamta ma tsa hwazla6akuha dza'a kwal katanafta hən ya.

⁷ Ta kumay hən ta nzakway ka gwal ta taghanafta zlahaz Lazglafta ta mnduha, ama sna a vərda hahən ta skwi ta mnə hən wa. Sna a hən ta vərda skwi ya sladaf hən tida guli wa.

⁸ Nda sna amu kazlay: Dina zlahu kə'a, ka nda tvani ksa mndu ta slna nda tsi.

⁹ Nda sna amu guli kazlay: Fa a lu ta zlahu ka ɲa gwal tdukwa wu kə'a, ama fafa lu ta zlahu ɲa gwal kul sna gwaɖa da mndu, nda gwal ta maga mbrəs, nda gwal ta sidi, nda gwal dmaku, nda gwal kul zləɲa Lazglafta, nda gwal kul snantá dzahay', nda gwal ta pslatá dadaha taɲ, nda gwal ta pslatá mndu,

¹⁰ nda gwal ta hliri, nda gwal ta hahanaku zgun nda zgun, nda gwal ta dzawaptá mndu ka vu'a, nda gwal tsakalawi, nda gwal ta wada a ta wadu ka bətbət, nda ya ɲa gwal ta maga sanlaha ma ghwadaka skwiha, ka zluɲtá vərɖaka tagha skwi.

¹¹ Tsa vərda tagha skwi ya ná, ta slanaghata ma Lfida Gwada fadim lu ɲa mnay ta ghəɲa glakwa Lazglafta lu.

Rfanaghatá Kristi

¹² Ta rfay yu ta Yesu Kristi Mghama mu, ta vlihatá mbraku prək maga slna da. Ta rfay yu ta ghəɲa vəl klaftani ta i'i ka mndu nda ra ɲa faftá ghən tida, ɲa maganata slna.

¹³ Aɲ mndani, nda nza yu ka mndu si ta pgha rutsak tida ghalya, ka mnda giri ɲani, ta balanata, ama ka tawatá Lazglafta ta hidahida ta i'i, kabga

ma kwala da kul snan̄ta si ta maga† yu ta tsa skwiha ya. Si had̄ zlḡhay nda n̄duf da i'i wa.

14 Ka zd̄id̄int̄á Mghama mu ta huđi katakata, ka vlihatá zlḡhay nda n̄duf, nda d̄vu ya ta mutsu lu ma guyatá vgha nda Yesu Kristi.

15 Wya tsa v̄erda gwada nda ra ka tsu'af̄ta inda mndu ya: Sasa Yesu Kristi ta gh̄n̄ja had̄ik n̄ja mbanaf̄ta gwal dmaku. I'i mali mataba tan̄.

16 Tsaya k̄al Lazglafta ka tawatá hidahida ta i'i. Kuman̄kuma Yesu Kristi ta maravata ma i'i ta nzakway ka mali mataba gwal dmaku ya, ta glakwa ksa n̄dufani. Nda nza ka gray n̄ja gwal dza'a zlḡhaftá tsatsi, n̄ja nzakwa tan̄ nda rfu n̄ja k̄dekedzen̄.

17 Ka nza sgit nda glaku n̄ja dekdek n̄ja Mgham kul had̄ ta mtavata, kul had̄ ta nghavata, tsatsi turtuktuk Lazglafta n̄ja k̄dekedzen̄. Amin!

18 Timute zwan̄ja da, na gwada ta mnaghata yu ná, manda va ya mna la anabi ta gwada ta gh̄n̄ja gha ghalya ya, n̄ja nzakwa na gwada na n̄ja vlaghatá mbraku, kada lavin̄ta ka ta vulaf̄ta v̄erdāka vulu.

19 Nanan̄ja ta zlḡhay nda n̄dufa gha nda fatá ndana gha kul had̄ sana dga gh̄n̄. Vz̄in̄vza sanlaha ta tsa fata ndanu kul had̄ dga gh̄n̄ ya, ka dzatá zlḡhay nda n̄dufa tan̄.

20 Mataba tsa mnduha ya na i Himene nda Alegzandra. Vlan̄vla yu ta h̄n̄ ta halaway‡, kada kwala h̄n̄ raz̄əḡaltá Lazglafta.

2

Na wa rakwa tsal̄bay mu ta tsal̄bu na?

† **1:13** Ngha ta sl̄na gwal ghunay 8:3, 9:4-5. ‡ **1:20** Gray nda 1 La Kwarent̄ 5:5, 2 Timute 2:17, 2 Timute 4:14.

¹ Skwi ya vli yu ta mbraku tanṭaṭa ta ghəṇani karaku ná, tsaya dawa skwiha da Lazglafta nda maga du'a, nda taw ma ghuvani, nda rfanaghata ta ghəṇa inda mnduha.

² Dina ka maga du'a ta ghəṇa mghamha nda inda gwal ta ṇanatá ga mgham, kada mutsafta mu ta nzaku leḃtekw, ma zdaku, ma zləṇa Lazglafta nda tvani, ṇa nzay mu ta nzaku manda ya ta raku dər ta wati ma tvi tsi.

³ Tsaya skwi dina ta zdəganatá Lazglafta mnda mba amu.

⁴ Ta kumay tsatsi ta mbafta* inda mndu, ka mutsafta taṅ ta sṇaṅtá kahwathwata.

⁵ Na nzakwani ná, turtuktuk Lazglafta. Turtuktuk mndu ta guyanafá mndu nda Lazglafta guli. Tsa mndu ya ná, Yesu Kristi ya

⁶ ta vlatá ghəṇani ṇa varatá inda mnduha demdem†. Tsaya skwi ya maga tsi ma fitik ya fa Lazglafta.

⁷ Ṇa tsaya kəl lu ka fatá i'i ka mnda mnay, ka mnda ghunay‡ guli. Nda nza yu ka mnda taghanaftá gwal kul nzakway ka la Yahuda§ ta gwada ta zlghay nda ṇuduf, nda kahwathwata. Tsakalawa da a wu, kahwathwata ta mnə yu.

Imi'aha nda zgwana

⁸ Ta kumay yu tama ta magay zgwana ma inda vli ta du'a nda kapatá dzvu ya nda ghuḃa hezle' nda ta luwa, nda gatá sidi a wu, nda zlərdawi a guli wa.

* **2:4** Gray nda Izekiyel 18:23. † **2:6** Gray nda Mata 20:28. ‡ **2:7** Gray nda 2 Timute 1:11. § **2:7** Gwal kul sṇaṅtá Lazglafta Da mu ta Luwa.

⁹ N̄a mi'aha ya guli ná, ka nzakwa hahəŋ nda hba vgha manda ya ta raku. Ma laghu həŋ da rka nda dátá ghəŋ ya nda bla. Ma laghu həŋ da rka nda dasu, dər nda mizidíkw, dər nda lgut ya nda bla dzvani* a tsi.

¹⁰ Ka rka həŋ ta rka nda n̄ərmata slnaha taŋ, manda ya ta ran̄ta mi'aha ta maran̄tá zləŋay taŋ ta Lazglafta.

¹¹ Ma fitika tagha skwi ya guli, seftekwa ka marakw nzata, nda hanatá ghəŋ.

¹² Vlan̄ a yu ta tvi ta marakw n̄a taghanaf̄tá skwi, dər n̄a ga mgham ta ghəŋa zgun wa. Seftekwa katsi nzata.

¹³ Adamu na tan̄tan̄a mndu zlaganap Lazglafta, kada magaf̄tá tsi ta Hawa.

¹⁴ Adamu a nanaf halaway guli wa, marakw ya nanaf tsi, ka kwalaghutá marakw ta snatá gwada Lazglafta†.

¹⁵ Dər má mantsa tsi, dza'a mbanafmba Lazglafta ta marakw nda ma yayni ta zwani, ka gdavagda tsi ta n̄avata ma zlḡhay nda n̄udufani, nda d̄vutá mndu, nda nzaku nda ghuáa.

3

Gwal ngha Igliz

¹ Nana gwada dza'a yu mnay na ná, gwada n̄a faf̄tá ghəŋ tida ya. Ka d̄vaf̄d̄va mndu ta slna nzakw ka mali ta ghəŋa Igliz katsi ná, n̄ərma skwi ya d̄van̄ tsi.

* **2:9** Gray nda 1 Piyer 3:3. † **2:14** Aya 13-14: Ngha ta Zlrafta 2:7, 21-22, 3:1-6.

² Dina ka nzakwa mali ta ghəŋa Igliz, ka mndu kul haɗ rutsak tida, turtuk ka markwani, zlahaf-zlaha katsi ta ghəŋani, ta ndanay katsi ta ndanu tɗukwa, dīna ka nzakwani, ta tsu'ay katsi ta mat-bay ga taŋ, nda sna katsi ta taghanaftá skwi ta mndu,

³ ma nza tsi ka mndu ta sa ima inabi, ma nza tsi ka mndu ta sidi, ama leɓtekw ka nzakwani. Ma nza tsi ka mndu ta ghazenzen, ma nza tsi ka mndu ɗvutá ta tseɗi.

⁴ Nda sna katsi ta ŋanató həgani, nda sna katsi ta zlaha zwanani ŋa nzakwa taŋ ka zwani ta sna gwada nda hanata ghəŋ guli.

⁵ Ka si sna a mndu ta ŋanató həgani wu katsi, wa kə'a dza'a laviŋtá nghtá Igliza Lazglafta na?

⁶ Ma nza tsa mndu ya ka lfiɗa mndu ma zlghay nda ŋuɗuf, da glə tsi ta ghəŋ, da zləmbamtá tsi ma mndərga tsa guma tsanagha lu ta halaway ya.

⁷ Dina ka nzakwani ka mndu ya ta ghubu dər gwal kul snaŋtá Lazglafta, kada nzakwa tsi ka mndu kul haɗ lu ta gagay nda gaga, da zləmbamtá tsi da dəɓla halaway*.

Gwal ksa slna ma səla mnduha

⁸ Gwal ta ksa slna ma səla mnduha ya guli, dīna ka nzakwa taŋ. Yaha həŋ pgha wirak his ma vu, yaha həŋ nzakway ka gwal ta sasaku, ka gwal ta zba tseɗi nda ta ghwadaka tvi.

⁹ Dina ka nzakway taŋ ka gwal ta ŋanató kah-wathwata ya marigiŋ lu ma zlghay nda ŋuɗuf nda fata ndanu kul haɗ sana dga ghəŋ.

* **3:7** Aya 2-7: Gray nda Titus 1:6-9.

¹⁰ Dina ka dzəghantá həŋ karaku. Tahula tsa, ka had sana skwi ŋa mnafta ta həŋ wu katsi, laviŋlava həŋ ta nzakway ka gwal dza'a ksa slna ma səla mnduha.

¹¹ Mantsa ya mi'aha ta ksa slna ma səla mnduha guli. Dina ka nzakwa taŋ. Had wu ka həŋ ta kuslemberaku, zlahafzlaha ka həŋ ta ghəŋa taŋ, ka ŋərmani ka həŋ nzakway ma inda skwi.

¹² Mndu ta ksa slna ma səla mnduha ná, turtuk ka markwani, pərdəfpərdə katsi ta zlahə zwanani nda gwal ga taŋ tani.

¹³ Ka nda tvani ta ksa gwal ta ksa slna ma səla mnduha ta slna katsi ná, ta vlanvla lu ta glaku ta həŋ ma inda vli. Laviŋlava həŋ ta gwada taŋ kul had zləŋ ma fatá ghəŋa taŋ ma zlghay nda ŋuduf ma Yesu Kristi.

Hya skwi ta vlamata zlghay nda ŋuduf

¹⁴ Ta vindi yu ta na delewer na ŋa gha ná, nda fa ŋudufa da ta labə da nghaghghata.

¹⁵ Ala, ka gərdugərda yu katsi, dza'a nda sna ka káka dza'a nzaku ma həga Lazglafta ta nzakway ka Igliz, hahəŋ gugudí ta dihanatá kahwathwata.

¹⁶ Manda va tsaya ná, dagala nzakwa skwi ya nda dífa payaf Lazglafta, ta nzakway ka Kristi ya zlghaf mu.

Marigiŋ mara Lazglafta ka mnda səla. Tudúkwa
nzakwani,

ka Sulkum nda ghu6a† maraŋta.

Nda ngha duhwalha Lazglafta, ka mnə lu ta gwada tida, ŋa inda gwal kul nzakway ka la Yahuda.

Ka zlghaftá mnduha ma inda vli ta ghəŋa hadík.

† 3:16 Gray nda Ruma 1:4.

Ka klaghatá Lazglafta ta luwa da vla glakwani.

4

Tagha skwa gwal tsakalawi

¹ Tsalinjtsala Sulkum nda ghuḅa kazlay: Ma kdavakta fitik ná, dza'a zlanavazla sanlaha ta zlg hay nda ṅudufa taṅ, ka laghwi da sna ṅa sulkumha ta nana mndu, nda tagha skwi ya ta klagapta ghwaḍaka sulkumha kə'a.

² ṅa nanaghata gwal ta maga maḍgwirmaḍgwir, ta mna tsakalawi, ta həṅ. Vli ma ndana tsa mnduha ya ná, manda datá kufur ghandand ma vu ya nzakwani.

³ Dza'a lmay həṅ ta kla marakw, dza'a lmay həṅ ta zay lu ta sanlaha ma skwa zay. Wya Lazglafta ta zlagiginjá tsa skwiha ya ṅa zay gwal zlg hay nda ṅuduf, gwal nda sna ta kahwathwata. Ta zə həṅ ya, ṅa rfay taṅ ta Lazglafta ta ghəṅani.

⁴ Manda va tsaya, inda skwi zlagiginj Lazglafta ná, dīna* nzakwani. Ka ta rfanagharfa lu ta Lazglafta ta ghəṅa skwi ta zə lu, haḍ sana skwi ṅa wudanaghuta wu,

⁵ kabga ghuḅin ghuḅa Lazglafta nda gwaḍani nda ya nda ma maga du'a guli.

Nzakway ka vərda mnda maganatá slna ta Yesu Kristi

⁶ Ka taghanaftagha ka ta inda tsa skwiha ya ta zwanama katsi, dza'a nzakway ka ka ṅərma kwalva Yesu Kristi. Dza'a maraṅmara ka kazlay: Nda bagha ka nda gwaḍa zlg hay nda ṅuduf, nda ya nda vərḍaka tagha skwi ya taghaf ka kə'a.

* **4:4** Gray nda Zlrafta 1:31.

⁷ Zluṅzla ta gwaḍa prukutunzumha ta gwaḍa halata mi'aha. Navaṅa kagha, ka nza ka ta nzaku ma ndi'ata vgha gha nda Lazglafta.

⁸ Skwi dina zavzava ṅa hwaya us ma vgha, ama sira a katu mida wa. Ndi'atá vgha nda Lazglafta katək na vərḍa skwi ta kata mndu ma inda skwi, kabga da tsatsi na ta ta imi ta sləmənṅ ta ghəṅ nzaku ya ndanana, nda nzaku ya ta kəma.

⁹ Nana gwaḍa na ná, vərḍa gwaḍa ya, nda ra ka tsu'afta inda mndu kul haḍ sana dzudzukway.

¹⁰ Taghəṅa tsaya ta kəl mu ka dzatá vgha ka ṅavata ka maga slna, kabga nda fa ghəṅa mu ta Lazglafta ya nda hafu mida. Tsatsi ta nzakway ka mnda mba inda mndu, katkatatani gwal zlgħay nda ṅuḍuf.

¹¹ Tsaya skwi dza'a ka sladanata, ka tagħay.

Nzanza ka mndu ṅa ksa sadani

¹² Yaha mndu da hərtətətá nzakwa gha ta ka zwaṅ. Katək ná, nzanza ka ṅa gwal zlgħay nda ṅuḍuf, ka mndu ṅa kla sadani ma tva gwaḍa, ma tva nzaku, nda ya ma tva nzaku nda ghuḍa.

¹³ Ma kdaku yu ka labə ya, ka gḍata ka ta dzaṅanaftá gwaḍa† Lazglafta ta mnduha, ka vla ka ta mbraku ṅa taṅ, ka tagħa ka ta skwi ṅa taṅ.

¹⁴ Yaha ka da ganavatá masfa ta skwi ya vlagħa Sulkum ma kagħa, ya vlagħa lu ma fitika mnata la anabi, ka faghagħatá la galata mndu ta dzvu ya.

¹⁵ Nafṅa ta vgha ta tsa skwiha ya, ka maga ka nda kdavakta ṅuḍufa gha, ṅa nghanṅa inda mnduha káka ta dza'a ta kəma ta kəma.

† 4:13 Ngha ta Lukwa 4:16-21.

¹⁶ Dasuwa ka ka nda nzakwa gha, dasuwa ka ka nda skwi ta taghə ka guli. Ndi'amndi'a mida. Ma tsa magay gha mantsa ya, dza'a mbanafra ka ta ghəŋa gha, nda gwal ta fata sləməŋ ka snay tani.

5

Vla ta hidaku ŋa inda gwal zlgħay nda ŋuduf

¹ Ma davə ka ta glata mndu. Nda dasuwa ká ka gwada nda tsi, manda skwi nda da gha*. Manda mna gwada ŋa zwanama gha ka ka gwada nda zwana duhwalha.

² Galata mi'aha ya guli ná, manda mamaha gha, káka ngha həŋ. Ngha ta daghala mi'aha manda kwagha ma gha kul had ndanantá sana skwi nda həŋ.

Mi'a wadgu

³ Vla ta glaku ŋa vərđaka mi'aha ka wadgu, ka matuŋulum.

⁴ Ka si mamu zwana tsa wadgu ya, ka zighihani a tsi katsi, tiŋəl hahəŋ dza'a zlrafta katanťá gwal ga taŋ, ŋa planamtá dzva taŋ. Tsaya skwi ta zdəganatá Lazglafta.

⁵ Tsa vərđa wadgu ta nzakway ka matuŋulum kul had mndu ŋa katanťa ya ná, ta Lazglafta fafta tsatsi ta ghəŋani. Had ta zlanťá maga du'a, ka tawa ghəŋ da Lazglafta nda fitik tani, nda rvidik tani, ŋa dawa katu da tsi wa.

⁶ Ama wadgu ya ta nzaku ta daghayakwani ná, nda mta tsaya dər má ta ndiri tsi.

⁷ Tsaya skwi dza'a ka havanaktá həŋ, kada nza-kwa həŋ kul had rutsak ta həŋ.

* **5:1** Gray nda Levitik 19:32.

⁸ Ka had mndu ta nghapta ka la taŋ, katkatatani la ma həga ga taŋ wu katsi, ɓliŋɓla tsa mndu ya ta zlgħay nda ŋuɗuf, mal tsatsi badzatani ka mndu kul zlgħaftá Yesu.

⁹ Marakw ya mtu zə'ala taŋ ná, ta magay ka imani ta mku' mbsak, kada mbəɗamta lu mataba mi'a wadgu. Tsa si turtuktuk yeya ka zə'al snaŋ tsi guli.

¹⁰ Ta ghubay ka lu ma ŋərma slnahani ta magə tsi. Va galanafgala katsi dīna ta zwani, ta tsu'ay katsi ta matbay ga taŋ, ta mbazay katsi ta səla gwal zlgħay nda ŋuɗuf, ta katay katsi ta gwal ta sa duni, fafa katsi ta ghəŋani ka maga inda ŋərma slna.

¹¹ Yaha ka mbəɗamtá mi'a wadgu ta ka daghali ma tsa mbsak ya, kabga baɗu sli'avafta ɗva zgun ma vgha taŋ, ka dganatá həŋ nda Kristi ná, zbay taŋ ta dza'agelta da zə'al.

¹² Dza'a ksay guma ta həŋ kabga ɓlanapɓla həŋ ta skwi ya si kura həŋ taŋtaŋ.

¹³ Taghəŋa tsa guli, had sana skwi ta magə tsi ta ghəŋa sli'ani da ra watgha həga ga mndu wa. Dza'a ra watgha həga ga mndu yeya a guli wu, dagala va yawa taŋ. Gwada kul nghanatá həŋ ná, tsaghuzlaram ka həŋ dida.

¹⁴ Tsaya tama, ta kumay yu ta sli'a mi'a wadgu ta ka daghali ya da zə'alha taŋ, ka yaya həŋ ta zwani, ka nghan həŋ ta həga taŋ, kada kwala ghumaha mu ta mna gwada kul raku ta amu.

¹⁵ Mamu sanlaha ta gi ghadata mbəɗagħutá vgha, ka zluŋtá vərɗa tvi, ka laghwi mista hal-away.

¹⁶ Ka mamu sana marakw ta zlgħaftá Yesu, nda mi'a wadgu ma mndəra taŋ katsi, ka kata tsi ta həŋ,

yaha tsi zlanantá Igliz, kada laviŋta Igliz ta katanťá vərda wadguha ya ta duŋluŋwaku.

Gwal ngha Igliz

¹⁷ La galata mndu ta ksa slna đina mataba Igliz ná, đina ka vla glaku dagala ŋa taŋ. Katkatatani gwal ta mna gwada, nda gwal ta tagha skwi ŋa mnduha.

¹⁸ Ka lu vindafta ma gwada Lazglafta na: «Had kuni dza'a hbunustá budzaŋ ta wi ta sla ta dga hya wu,» ka'a. Mantsa ya ka'a guli na: «Raŋra vlanťá nisəlani† ta mndu ta ksa slna,» ka'a.

¹⁹ Ma gi tsu'af ka ta gwada ta mnafta lu ta sani ma glata mndu ta ksa slna mataba Igliz. Ba mamu ka masləmtsək tađ his ka hkən a tsi ta snanaghata.

²⁰ Gwal ta ga dmaku ya, dvanaghadvə ta həŋ ta kəma inda mnduha, kada ganafta tsi ta zləŋ ta sanlaha.

²¹ Ta ndəba dzvu yu ŋa gha ta kəma Lazglafta, nda Yesu Kristi, nda ya ta kəma duhwalhani zabap Lazglafta. Snasna ta tsa gwada ya, yaha ka da laghwi da đva ghəŋ. Yaha ka da gala mndu nda gala.

²² Yaha ka da gi hwaya fanaghatá dzvu ta ghəŋa mndu ŋa vlanťá slna mataba Igliza Lazglafta. Yaha ka da hba huta mista mndu ta gatá dmaku. Ngha ta ghəŋa gha, yaha ka faftá rutsak ta vgha gha.

²³ Yaha ka gđata ta sa imi kwenkwen, ama ka sa ka ki'a ta ima inabi, ŋa ghzla skwi ma huđa gha, nda ya ŋa ghzla tsa gđata ta gđata ka kul đughwanaku ya.

† **5:18** Ngha ta Vrafta ta zlahu 25:4 nda 1 La Kwareŋt 9:9, Mata 10:10, Lukwa 10:7.

²⁴ Sanlaha ma mnduha ná, ta daʔi dmakwa taŋ, dər ta la a lu tsanaghatá guma ta hən. Ama tahula tsanaghatá guma ta hən ta nghavata ɲa sanlaha.

²⁵ Manda va tsaya guli, ta nghaku ɲərma slna ta daʔi, dər má sabə a tsi ta daʔi gi hadahada wu, dífaghuta a wa.

6

La vu'aha

¹ Inda gwal ta ga vu'a, ka vla hən ta glaku ɲa danahəgaha taŋ, kada kwala mnduha ta raza Lazglafta, nda skwiha ya ta taghə mu.

² Ka gwal zlgħay nda ɲuduf na danahəgaha taŋ katsi, yaha hən da kwal kul sna gwada da hən, kabga nzakwa taŋ ka zwanama ma zlgħay nda ɲuduf. Ka ɲavanɲa hən katək ka maganata slna taŋ nda tvani, kabga tsa danahəgaha taŋ ta maganata hən ta slna ya ná, gwal zlgħay nda ɲuduf ta dʋu Lazglafta hən.

Ma tsemi ta saba inda ghwadaka skwi

Tsaya skwiha ɲa taghay gha ɲa mnduha. Ka vla ka ta mbraku ɲa taŋ.

³ Ka lagha mndu ka tagha sana skwi tskəm, ka zluŋtá vərɗaka gwada Mghama mu Yesu Kristi, nda skwi ya ta taghə mu ta ranjá zlgħay nda ɲudufa amu katsi,

⁴ tsa mndu ya ná, gla ghən ta glə tsi, had sana skwi snaŋ tsi wa. Dughwana a ma ndanani wa, zlərdutawi nda mbaɗa gwada yeya snaŋ tsi. Ma tsaya ta saba drakuha, nda zlərdutawi, nda razuha, nda ghwadaka uwa'uwalakuha

⁵ nda zlarđutawi kul kđavakta mataba gwal kul had ghunislak ma ghəŋa taŋ. Snəgla a həŋ ta kahwathwata wa. Dina ná, skwi ŋa mutsa gadghəl ya ka hahəŋ ta ndanay.

⁶ Manda va tsaya nzakwani, dina ná, mghama gadghəl ya, ka ta rfu mndu nda kuraghuta skwi ya da tsi.

⁷ Aŋ mndani, had sana skwi ya klaganam mu da ghəŋa hadik wa. Manda va tsaya guli ná, had sana skwi ya dza'a klinŋta mu guli wa.

⁸ Tsaya tama, ka mamu mu nda skwi ŋa zay, nda skwi ŋa suday ta vgha ya ná, prək mu nda tsa.

⁹ Ama gwal ta zba nzaku ka gadghəl ná, ta dədamdəda həŋ da skwi ta dzəgha mndu. Ŋa dədamta taŋ da dəbla ghwadaka mnduha ta badza mndu, nda ya ta zadanatá mndu ŋa dekdek.

¹⁰ Dvutá tsemi ná, ta klakkla ta slrəŋa inda ghwadaka skwi. Ma tsa dvuta taŋ ta tsemi ya, ka zlanavatá həŋ ta zlghay nda ŋudufa taŋ, ka garaḅ tsi ta həŋ katakata.

Vərdaka vula zlghay nda ŋuduf

¹¹ Ama kagha mnda Lazglafta, wara ta tsa skwiha ya. Ka zba ka ta tva nzaku tđukwa, nda tva ndi'navatá vgha ta Lazglafta, nda tva zlghay nda ŋuduf, nda tva dvutá mndu, nda tva ksa ŋuduf, nda tva nzaku leḅtekwa guli.

¹² Lma ta vərđa lma zlghay nda ŋuduf. Zak za ta hafu ŋa kdekedzen, kabga hgafhga Lazglafta ta kagha ta ghəŋani ma mnəŋta gha ta ŋərmata zlghay nda ŋudufa gha ta kəma ndəghata masləmtsəkha.

13 Ka yu ta mnaghata ta kəma Lazglafta ta vla hafu ŋa inda skwi, nda ya ta kəma Yesu Kristi ta mnigintá vərda gwada ta kəma Pwanəs Pilat* ná,

14 ka ŋanata ka ta na gwada ta mnaghata yu na. Ka nzata ka kul had sana skwi ta kagha, kul had rutsak, ha ka sagha fitik dza'a kəl Mghama mu Yesu Kristi ka maravata.

15 Dza'a maravamara bađu fitik ya tsaf Lazglafta. Da tsa Lazglafta ya inda mbraku. Tsatsi Lazglafta turtuktuk. Tsatsi dzuḅaya zdaku. Tsatsi ta ga Mgham ta ghəŋa mghamha†. Tsatsi mgham ta malaptá mghamha.

16 Tsatsi turtukwani kul had ta mtavata, ta nzaku ma tsuwadak kul laviŋtá mndu ta ḅhanavata. Had mndu ta kdə nghanṭa wa. Had mndu dza'a laviŋtá nghanṭa‡ guli wa. Ŋani glaku, nda mbraku, ŋa kḁekedzen. Amin!

Vlanṭá hidaku ta gwal ka gadghəl

17 Mnanamna ta gwal ka gadghəl ma na ghəŋa hadik na, yaha həŋ da ghərḅaku, yaha həŋ da laghwi da faftá ghəŋa tanṭa gadghəla§ tanṭa ya dza'a kwal kul nzḁavata. Ta Lazglafta ya ta vlamatá inda skwi ka haslay ŋa nzakwa mu nda rfu ka həŋ faftá ghəŋa tanṭa.

18 Mnanamna ta həŋ ka maga həŋ ta zdaku. Ka sganaghata həŋ ta maga skwiha ḁinadina. Mnanamna ta həŋ ka muvla həŋ ta muvla, ka vla həŋ ta skwi ŋa katanṭá sanlaha nda tsi.

* **6:13** Ngha ta Yuhwana 18:36-37, 19:11. † **6:15** Gray nda Vrafta ta zlahu 10:17, Zabura 136:3. ‡ **6:16** Gray nda Zabura 104:2, Sabi 33:20, Yuhwana 1:18. § **6:17** Gray nda Lukwa 12:20.

¹⁹ Ka mantsa ya ka həŋ magay, dza'a tskanatska həŋ ma nərma vli ta skwiha taŋ, ɲa slafta taŋ tida bađu mahtsim*, kada mutsafta həŋ ta vərda hafu.

Dzatá ghəŋa gwada

²⁰ Timute da, dasuwa ka ka ɲanatá skwi ya fagham Lazglafta ma dzvu. Ma fam ka ta wa gha da gwaɗaha ka bətbət kul gra vgha nda zlgħay nda ɲuɗuf, nda tagħa skwi ya ta mnə lu kazlay: Snaŋtá skwi kə'a ya, tsaw tsakalawi ya.

²¹ Ma famtá ghəŋ ka tagħa tsa skwiha ya, kəl san-laha ka Pak zlgħay nda ɲuɗuf. Ka nza zɗakatahuda Lazglafta nda kaghuni!

* **6:19** Gray nda Mata 6:20.

Deftera Lfida Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

f257b780-c0dd-5cce-9b20-430484439898